

四庫全書

集部

欽定四庫全書

集部

會昌一品集卷一至四

詳校官監察御史<sub>臣</sub>范衷

檢討<sub>臣</sub>何思鈞覆勘

總校官庶吉士<sub>臣</sub>倉聖脉

校對官編修<sub>臣</sub>勵守謙

謄錄進士<sub>臣</sub>黃嵩齡

欽定四庫全書

集部二

會昌一品集

別集類一唐

提要

臣等謹案會昌一品集二十卷別集十卷外集四卷唐李德裕撰德裕有次柳氏舊聞已著錄是編凡分三集會昌一品集皆武宗時制誥外集皆賦詩雜文窮愁志則遷謫以後閒居論史之文也明代袁州有刊本然僅會

昌一品集十卷外集四卷此本正集二十卷別集十卷外集四卷即窮愁志與晁公武讀書志所載相合意即蜀本之舊歟陳振孫書錄解題稱衛公備全集五十卷年譜一卷又稱蜀本之外有姑臧集五卷獻替錄辨謗畧諸書共十一卷則其本不傳久矣史言德裕在穆宗朝為翰林學士號令大典冊咸出其手而文不多傳意皆在五十卷內也會昌一

品集序鄭亞所作李商隱集所謂滎陽公者是也其文亦見商隱集稱代亞作而兩本異同者不一考尋文義皆以此集所載為長蓋亞所改定之本云乾隆四十四年二月恭校上

總纂官

臣紀昀

臣

陸錫熊

臣

孫士毅

總校

官

臣

陸費墀



會昌一品集原序

綸綍之興載籍之始先王發號施令明罰勅法蓋本於此也唐虞之盛二典存焉夏殷之隆厥有訓誥自胤征甘誓乃有誓命之書皆三代之文一王之法也虞夏之際代祀繇遠其代工掌制之名氏莫得而知至於成湯太甲則有仲虺伊尹為之訓誥高宗得傳說則有說命之篇周公召公相成王則有洛誥酒誥周官顧命秦始皇帝并一區宇丞相李斯實掌其言漢興當秦焚書之

後侍從之臣皆不習文史蕭曹之輩又乏儒墨之用每  
封功臣建子弟其辭多天子為之縱委於執翰者亦非  
彰灼知名之士武帝使司馬相如視草率皆文章之流  
以相如非將相器也厥後寢微寢長下於魏晉亦代有  
其人我高祖革隋文物大備在貞觀中則顏公師古岑  
公文本興焉在天后時則李公嶠崔公融出焉燕許角  
立于玄宗之朝常楊繼美於代宗之代洎憲宗皇帝英  
武啟運雄圖赫張中興之業高映前古其時則先太師



忠公翺翔內署有密勿贊佐之績平吳定蜀時惟其功  
及登樞衡作霖雨尊王室卑諸侯圖蔡料齊外定內理  
顯王言于典誥彰帝範于圖籍紀在徽冊播于無窮特  
進太子少保分司東都衛公長慶中事惠皇為翰林學  
士訓誥之業彰于前聞昭肅皇帝統握乾符寤寐良弼  
詔自淮海復升台庭盡付玄機允厭神度每彤墀奏罷  
列承天睦帝亦講伊尹傳說之旨定元首股肱之契以  
太平之制度上古之文教咸屬于公焉會先太后懿號

未立帝明發有永懷之痛公述沙麓神井之瑞贊統樞  
懷日之慶懋遵聖緒光慰孝思于是承命有宣懿祔廟  
之制及武宗郊昊天拜清廟文物胥備朝廷有禮華夷  
述職河朔修貢乃顯神休薦徽號奉揚一德以示萬方  
于是撰仁聖文武至神大孝之冊封域無虞天子翛然  
有求玄之思乃範貞金模聖表隆準日角燭于宮庭中  
外臣僚咸欲頌山河而褒日月也公于是有聖容之贊  
天街之北獫鬻攸居因饑憑陵怙衆強禦嚴之以刁斗

而勃爾無懼申之以文告而腴然不率天子震怒旋命  
征之公獨運沈機上資宸斷萬里勝負決于帷中雷霆  
既震犬羊遂潰疣贅披抉腥羶解離遁其名王復我貴  
主于是有討北狄之詔天寶末薊門為首亂之地瘡痍  
榛棘襲世未平至於漁陽帥仲武埽除妖孽臧獲仇讐  
奉揚威神乃底康靖仍願勒石于盧龍之塞以叙聖功  
飛章上聞帝用允若公祇膺明命舒展格言呼嘯神祇  
吐納嵩華當畫而文星見不寐而白鳳來成諸侯不朽

之勲尊元后無私之化公於是有幽州紀聖功之碑潞  
帥劉從諫死其子因關河之險恃甲兵之衆請爵爭地  
屢聞王庭中外疑迷互撓天聽帝將耀神武公累罄忠  
謀且言曰重耳在喪不聞利父雒渠受戮祇以抵君況  
明皇舊宮天井內地跨搖河北脅倚山東豈可行有匪  
人坐為汙俗若可忍也孰不可容沃心無疑躡足乃定  
又曰上黨居天下之脊當河朔之喉今漳水雄兵常山  
勁卒是為唇齒實懼因依不若乘其未萌制其將動帝

俞其奏乃妙選使臣以勞諭之嚴立刑賞以勸戒之魏  
侯鎮侯勦力從命絕壺關之右臂收泝水之上游獲茲  
渠魁在此成算又轅門叛將橫水餘克竊上相之旌旗  
盜晉陽之管鑰帝怒斯赫人心愈疑咸以師老于郊巢  
巢尚固議罷兵者蚊聚請宥過者雷同公又揚笏而言  
曰彼地則義師帥分宗室是玄祖勤商之邑后稷造周  
之邦瓜瓞具存堂構斯在苟虧策畫不襲仇讐則是獎  
彌年逐主之風長冒頓射親之俗詩稱築室于道書謂

疑謀勿成由是洞啟宸衷大破羣議運籌制勝舉無遺策防微慮遠必契神機授鉞之臣伏膺承命謝安之圍碁尚刼曹參之飲酒方酣果有軍書繼聞戎捷砥磨周鉞水淬鄭刀萬里來袁尚之頭顱二冢葬蚩尤之肩髀歡聲雖震于朝市喜氣不見於形容何其纂立功勲鎮定風俗若是之重也公於是有伐上黨之制平晉陽之敕宗英可汗獻琛貢賁越自絕漠通於本朝文畢伯氏之肩呼韓谷蠡之師或執玉而朝靈囿或解辮而拜甘

泉並垂於冊書光彼明命公於是有諭回鵲之命五慰  
堅昆之書四文章等於訓傳機事出於神明固將偃仰  
邳石之符倣睨鬼箱之錄聞之者可以祛聾瞶得之者  
可以弼邦國每牙管既拔芝泥將熟常於前席親授筆  
札公亦分陰可就落簡如飛時有急宣關於密畫內庭  
外制皆不與聞或勢切疾雷機難終日宣室未召武帳  
莫開公則手疏封章達於旒宸當乙夜觀書之際未嘗  
不稱美再三此又豈可與傳洞簫而諷于後庭聞子虛

而嗟不同世者論功校德邠歲在乙丑羣公常伯以天子之道貫於神祇一年而風雨攸序災沴不作二年殲醜虜興北伐之師四年誅狡童詠東征之歌而又移摩尼之風壞浮圖之俗偃兵返樸四海胥定思欲增鴻名光下武公乃觀東序之圖按西崑之牒鋪舒名實藻緼文采類於上帝為唐神宗於是纂章天成功神德明道之冊文號位既畢華夷會同方將命禮官召儒者訪匡衡后土之議採公玉明堂之圖考肆覲之禮於梁生取



封禪之文于天子盡皇王之盛事極臣子之殊功而軒  
鼎將成禹書就掩然猶進先嘗之藥獻高手之醫藏周  
旦請代之書追漢宣易名之美作為大誥祈于昊天始  
終一朝紹續九德其功伐也既如彼其制作也又如此  
故合武宗一朝冊命典誥奏議碑贊軍機羽檄凡兩帙  
二十卷輒署曰會昌一品制集紀年追聖德也書位旌  
官業也歲在丁卯亞自左掖出為桂林九月公書至自  
洛以典誥制命示于幽鄙且使為序以集成書尋玄珠

莫究其倪域聽希聲莫窮於高下承恩震恐幾移朝夕  
援筆而復止者三四伏念江陸盡盪辭讓不及因齋潔  
以序焉夫全功難恃大名難兼日赫于晝而乏清媚月  
皎于夜而無陽煦冬之為候也則雪霜飄暴凍入肌髮  
夏之為用也則金流石爍火走膚脈如陽春高秋者稀  
焉南則毒虺之為厲也北則獫狁黠虜之為患也如洛  
邑咸秦者幾焉雕鷲不傳之以馳騁驂騑不授之以騫  
翥如應龍者鮮焉仲尼聖賢之宗也位止於司寇老聃

道德之祖也官不過柱史如姬旦者幾焉是以保衡傳  
說左右殷宗召公畢公寅亮周室咸著大訓克為元龜  
書契以來未之多有李斯以刻石紀號之文勝而不在  
休明之運又何足數哉周勃霍光雖有勲伐而不知儒  
術枚舉嚴忌善為文筆而不至巖廊自是已降其類實  
繁惟公蘊開物致君之才居元弼上公之位建靖難平  
戎之業垂經天緯地之文萃於直躬慶是全德蓋四序  
之陽春九州之咸維品彙之應龍人倫之姬旦後之學

者其景行之云爾鄭亞序

欽定四庫全書

會昌一品集卷下

唐 李德裕 撰

徽冊讚

上尊號玉冊文

會昌二年

奉勅撰

維會昌二年歲次壬戌四月乙丑朔十四日戊寅攝太尉光祿大夫守司空魚門下侍郎同中書門下平章事臣德裕銀青光祿大夫守尚書左僕射魚門下侍郎同

中書門下平章事臣夷行金紫光祿大夫尚書右僕射  
兼中書侍郎同中書門下平章事臣拱銀青光祿大夫  
守中書侍郎同中書門下平章事臣李紳及文武百官  
金紫光祿大夫檢校司徒兼太子太保臣僧孺等六千  
五百七十四人言臣聞義皇首太古之號成湯顯神武  
之稱我高祖皇王是憲尊名若古貽厥丕訓為子孫之  
法豈不善始善述哉矧乃巨唐受命繼體承業理運將  
至大君以興昊穹所以開至聖也曩者明兩未定帝華

不協舍肩傳聖深惟至公先后所以昭天命也亦猶堯  
發於唐侯文興於代邱神明之祚不其難哉伏惟皇帝  
陛下清明溥光耿四海玄德莫隣天休大賚日角見  
表氣志如神爰初定命正心理物如辰居極而天下無  
邪矣由是昭德塞違尊賢遠佞禹不自滿成不敢康罔  
盤于田不邇于色自閨壺以施王教由家道而刑國風  
去比周覈名實擗乾綱擇聖紀修舊典協誠質托嘉壇  
款泰一進正臣以端治表禮故老以求讜言遠無蔽獄

近無留命祈玄祖而膏雨降祀靈岳而嘉穀登省刑罰  
而蓬宇消發倉廩而螽螟息去歲龍旂承祀大輅親郊  
捧玉瓚而一獻光靈來格振金石而六變魄寶昭臨然  
猶古訓是學緝熙于道天文炳煥雲漢其章溫恭敬遜  
承太任之教和樂愷悌洽戚藩之心德風偃于羣黎威  
霆動于絕域又以敬養不逮于長樂昭配未升於禰宮  
每懷慈徽蒸蒸日上所以奉若慈訓對越兩儀因心立  
制永錫其教寬虔劉之罪興惻隱之仁回電收霜為之



反汗及單于慕義景附朔邊耀德戢兵謙臨是受至於  
備文物展國容莫不先甲而布甘澤丁辰而廓陰雨和景  
晏溫卿霑網緼斯所謂神祇之心應矣天人之際交矣  
於是服冕之士戴鵲之倫暨藩侯邦伯黃髮駘背不謀  
而進曰陛下玄默天晬輝光日新大矣孝熙四極爰臻  
誠宜玉版溫潤鏤鴻明之德神寶焜耀薦萬斯之年丕  
夫大典不可辭也陛下猶謙退固拒至于三四羣臣不  
已乃曰俞哉夫徧覆包含之謂仁極深研幾之謂聖憲

度著明之謂文蠻夷震懾之謂武威而遂通之謂神無  
思不服之謂孝臣等不勝大願謹奉玉冊玉寶上尊號  
曰仁聖文武至神大孝皇帝伏惟陛下乾健不息謙尊  
而光樂戒其耽禽戒其荒壽乃侔於殷宗俗乃厚於成  
康貽燕後昆受福無疆臣德裕等誠歡誠躍頓首頓首  
謹言

上尊號玉冊文

會昌五年

維會昌五年歲次乙丑正月己酉朔一日己酉光祿大

夫守太尉兼門下侍郎同中書門下平章事臣德裕光祿大夫守尚書左僕射兼門下侍郎同中書門下平章事臣棕朝議大夫守尚書右僕射兼中書侍郎同中書門下平章事臣讓夷朝議大夫守中書侍郎兼戶部尚書同中書門下平章事臣崔鉉及文武百官大中大夫太常卿臣孫簡等六千二百二人言臣聞在昔周宣獫狁內侵四牡薄伐以定王國則詩人大其功暨於漢宣北夷乖亂呼韓慕義郅支遠遁則簡策著其美惟此二

代稱為中興間者開成之末星孛如雲螟飛蔽天先帝  
戚之黎人懼焉乃授至聖遺大投艱迄茲成功厥有冥  
數伏惟仁聖文武至神大孝皇帝表應龍翼粹合乾剛  
神全而正氣凝宇定而天光發智燭千里動必察微心  
鏡萬機物來斯應於是三材用四維張建中和之極綴  
前聖之綱重樞機修法制刑御家之理無出壺之言銷  
讒邪遠佞幸絕背公之黨退好徑之人內嚴體貌增堂  
陛之峻外絕締交去輔車之勢古所謂受命于天惟舜

獨正也又曰一心定而萬物服惟陛下得之曩者北狄  
矜功耗蠹中國種類磐乎根柢封殖異術肺腑縞衣如  
荼挾邪作蠱浸淫宇內倒懸不解百有餘年既而龍祠  
埏滅攜國款塞質帝女蹙海疆有狼顧平城之心鯨吞  
咸洛之志爰命梟將擐旗刈旃兵鏖穹廬火烈荆榛颺  
剝幘碎輶輶六羸遁逃貴主生還剗滅妖跡剿除醜類  
故名王結髮冠帶入臣堅昆稽首鞮鞞來獻而又姦臣  
放命二紀陸梁據太行之固下窺洛邑通故絳之道旁

晚近關樹其遺孽以竊兵柄議者僉曰積甲十萬積穀  
十年泉魚不察湯網宜懸陛下雄斷霆聲群疑冰釋揚  
清風而掃雲鼓迅雷而破山任馮異則拔天井而振上  
黨仗吳漢則發突騎而窺邯鄲壺關失險山東奪魄屬  
有戍邊叛將竊發參墟人心搖蕩異議放肆陛下臨朝  
而言曰二寇獲罪於天予所不捨未三旬而定晉陽纔  
期年而滅潞子不以金購狔將多降不勞師克粵首馳  
報非至德感物孰能臻於此乎由是台宰百辟藩屏將

帥上言曰成伐東方而肅慎來賀景剪七國而王室乃  
安莫不始於武功終致刑措將以禋上帝薦祖宗宜受  
鴻名以答玄貺陛下猶謙遜而五讓之勤精弗已乃屈  
已以俞之雲漢為章所以昭法度也神明其德所以成  
教化也巍乎有功帝堯之則也勤於大道玄祖之訓也  
臣等不勝大願謹奉玉冊玉寶上尊號曰仁聖文武章  
天成功神德明道大孝皇帝伏惟陛下不有其名以保  
其成不德其功以戒其盈享殷宗之福致周道之平熙

金史卷一百一十一  
卷一  
我王度玉振金聲臣德裕等誠歡誠躍頓首頓首謹言

仁聖文武至神大孝皇帝真容讚

并序

仁聖文武至神大孝皇帝御極之五載氣應天和德感人心朝廷四方咸一於正以精蕩褻以道勝殘故得風雨時若螽螟歲息銷蓬宇為休氣驅戎狄為懷人北荒堅昆重譯而至厥有窘伐憑阻弄兵陸梁韋顧既伐夙沙自縛武功既成體德昭明前古未聞百王莫致之事皆歲隄於圖謀矣皇上以為大禹叙九疇敬五事豈不



曰魏恭則莊視明則正予欲作續傳照審其儀形且夫  
聖人潛心於天以通神明先定其神而萬物理矣昔之  
訪具茨期姑射在此而已況乎廣成之戒抱一玄元之  
去多欲予所遺道良謂是矣豈眩夫係風之言竒彼淖  
水之術從偃佺之所珍遺堯舜之令命也哉於是圖輕  
素寫良金擬鑑形於止水若凝視於清鏡五彩既彰穆  
穆皇皇居列仙之館近玄祖之光蓋以昭燕翼之謀顯  
丕承之德矣臣聞古之至聖必有竒相是以黃熊之瑞

應於龍體赤精之符協於圖表頎然而長文王所以王天下也體貌多奇漢高所以威海內也然則績事之微極於惟肖至於天光晬精日華明潤非可圖也庶彷彿焉末臣奉詔敢颺言曰

唐運中興天授大君軒耀其武堯煥其文北伐獫狁朔漠消氛西伏堅昆稽首稱臣稷生壺闕盜起河汾沈機先物雄斷解紛克定羣慝竟全大勲八表既寧萬機益勤爰命彩績載模天真崑閭仙岑峻極秋旻蓬瀛白日

光昭清晨涵育如天尊嚴若神輝赫網緼為龍為雲聖  
作物覩禎祥以臻宣光孕靈虞熙載甄政建中和金聲  
玉振泰階既平廟器乃陳化下以德持盈以仁四瀆宗  
海衆星拱辰億萬斯年藻朗日新

會昌一品集卷一

欽定四庫全書

會昌一品集卷二

唐 李德裕 撰

紀功

幽州紀聖功碑銘 并序 奉敕撰

幽州盧龍軍帥檢校尚書右僕射張公仲武往年修獻  
捷之禮今年有銘勲之請二者君子韙之豈不以諸侯  
有四夷之功獻其戎捷春秋舊典也宗周獻肅慎之貢

銘於楷矢天子令德也斯可以為元侯表可以為後代  
法聖上嘉其動而中禮乃命宰臣採其元功傳於惇史  
臣德裕敢颺言曰夫兵者所以除暴害也愛人則惡其  
為害禁暴則惡其為亂雖睿智不殺化之以神至德允  
懷招之以禮然書有猾夏之戒傳有修刑之訓虞舜四  
罪乃成大功文王一怒以至無侮非德教之助歟仁聖  
文武章天成功神德明道大孝皇帝熙我文典煥乎光  
明極象外之微臻於至道鼓天下之動致於中和慮必

鉤深退而藏密故能神機獨照成未兆之謀威光遠震  
制不羈之敵當其時也烽燧迭警羽書狎至人心大搖  
羣師沮氣皇帝以軒后之威神漢高之大畧光武之雄  
斷魏祖之機權合而用之以定王業此議臣所以不敢  
望於清光也倬哉天地應而品物生君臣應而功業成  
故龍躍而雲成鶴鳴而子和方叔伐獫狁蠻荆來威安  
遠擊車師西域振服宜有良將殿於朔邊張公禮閱戰  
器書成傳癖張仲孝友子孺塞泉流落不偶光景未耀

明主雅聞奇志持印而拜將軍遙推赤心築壇而命元帥拔自雄武授之薊門果能精誠奮發策慮幅臆千里獻籌一心憂國則知龍顏善將任人傑而不疑日角好謀嘆敵國而強意回鶻者本北狄之裔也或曰獯狁或曰山戎五帝所不能臣三王所不能制前史載之詳矣暨薛延陀之敗也酋帥吐迷度率衆款塞太宗幸靈武納降立回鶻部落置瀚海都督因我封殖遂雄北方肅宗之戡內難也葉護以射鵰之士親護戎旌亦由羌髻



率師以翼周北貊梟騎以助漢既殄大憝乃疇厥庸特  
拜業護司空歲賜緡二萬疋厥後飾宗女以配之立宮  
室以居之其在京師也瑤祠雲構甲第綦布棟宇輪奐  
衣冠縞素交利者風偃挾邪者景附其翎侯貴種則被  
我文績帶我金犀悅和音厭珍膳蝸蠹上國百有餘年  
既而桀驚無親天命不祐僭侈極欲神道惡盈本國薦  
饑畜產耗半黠戛斯因利乘便遂焚龍庭區落蕭條陰  
燐青燐今之烏介可汗亡逃失國竊號沙漠非我冊命

自為假王其來也羨漫陰山睥睨高關玄塞之下氛霧蔽天質貴主以前驅依大國而求援或丐我米糒拯其饑人或邀我甲兵復其故地外雖柔順內有桀心因行人致詞徵呼韓故事願居光祿塞急保受降城其下有二部曰赤心宰相那頡喏特勒赤心者天性忿鷙戎馬尤盛初與名王噶沒斯首謀內附俄而負力怙氣潛圖厲階為噶沒斯所紿誘以俱謁可汗戮於帳下其衆大潰東逼漁陽上乃賜公璽書授以方畧公以室韋悍亟

之兵近我邊鄙俾其偵邏且禦內侵尋以徵役不供為  
虜所敗由是介馬數萬連亘幽陵伏精甲於松柄布穹  
廬於磧鹵散若飛鳥止如長雲火燎於原不可嚮邇公  
激義氣以虹貫發精誠而石開奇計兵權密授髦俊乃  
命介弟仲至與裨將游奉襄王如清左敵萬李君慶張  
自榮高守素李志操率銳兵三萬建旆而前介胄雪照  
戈矛林植命以義殉壯由師直聲隆隆而未洩欲逐逐  
而不食戢以聽命嚴而有威公曰險道傾仄且馳且射

胡兵所以無敵也致之平原勒以方陳我師可以逞志也於是捷於莽平環以武剛首尾蛇伸左右翼張輕騎既合奇鋒橫騖如摧枯株如搏羣兔驚懾者弗取陸梁者皆仆擄王侯貴人計以千數然後盡衆服聽悉數係繫谷靜山空靡有孑遺橐駝駢駢風澤而散旃牆罽幕布野畢收馬牛幾至於谷量流血殆同於川決徑路寶刀祭天金人奇貨珍器不可殫論乃命從事李周腫馳傳上奏又命牙門將周從玘繼獻戎俘皇帝受而勞之

羣臣畢賀昔長平七征驃騎一舉竇憲合氐戎之衆陳  
湯檻城郭之兵或生靈減耗士馬物故或邀功抹罪矯  
命專征然猶告類上帝薦功清廟顧視二漢不其慙歟  
以公威動蠻貊功在漏刻因命公為東面招撫回鶻使  
先是奚契丹皆有北使監護其國責以歲遺且為漢謀  
自回鶻嘯聚靡不鳴張公命裨將石公緒等諭意兩部  
戮回鶻八百人雖介子討罪於龜茲班超行誅於鄯善  
未足儔也回鶻又遣宣門將軍等四十九人詭辭結歡

潛伺邊隙公密賂其下盡得陰謀且欲馳入五原大毆  
雜虜公逗遛其使緩彼師期竟得人病馬瘡縮劒而退  
挫銳解紛繫公善計今烏介自絕皇澤莫敢近邊并丁  
令以圖安依康居而求活盡徙餘種屈意黑車寄託遠  
道流離饑凍黑車亦倚其威重迫脅諸戎造謀藉兵解  
仇交質自謂約齎深入漢將取而未期渡幕輕留王師  
往而非利公以壯猷遠馭長討羈縻不媮避嫌之便終  
致盡敵之術將時動而得雋豈歲數而勝微矧乎明主

仗將帥為爪牙視戎狄為鼠羗方獵猛敵不翫細娛非  
周宣無以成名虎之勲非漢宣無以聽營平之計勗哉  
上將光我中興公前後受降三萬人特勒二人可汗姊  
一人都督外宰相四人其他侯王騎將不可備載王褒  
以日逐歸德稱為人瑞班固以稽落盪寇大振天聲孰  
若天子神武百蠻振懼乘其感困臨以兵鋒刈單于之  
旗納休屠之附非萬里之伐無三年之勤巍乎成功輝  
焯後代宜刻金石以揚鴻休銘曰

太和之初赤氣宵興開成之末彤雲暮凝異鳥南來邊  
靖之徵北夷颺掃厥國土崩逼迫遷徙震我邊鄙長蛇  
去穴奔鯨失水上都薊門兵連千里曾不畏天猶為驕  
子丐我邊穀邀我王師假我一城建彼播旗歸計強漢  
鄧支嫚詞狼顧朔野伏莽見誅雁門之北羌戎雜處澱  
澱羣羊茫茫大鹵縱其梟騎驚我牧圉暴若豺狼疾如  
風雨皇赫斯怒羽檄徵兵謀而淵默斷乃雷聲沈機變  
化動若神明沙漠之北虜無遁情漁陽吳騎燕歌壯氣



料料元戎耽虎視金鼓誓衆于旄蔽地爰命介弟屬  
之大事翩翩飛將董我三軍稟兄之制代師之勤威畧  
火烈胡馬星分戈回白首劍薄浮雲天街之北旄頭已落  
絕轡之野虫尤未縛俾我元后恢宏遠畧取彼單于係之  
徽索陰山寢烽亭徵橐弓萬里昆吾九譯而通蠻夷既同  
天子之功儒臣篆美刊石垂鴻

異域歸忠傳序

會昌二年四月甲申回鶻大將嗚沒斯率其國特勒宰相尚

書將軍凡十二人大首領三十七人騎士二千一百六十八人內附制授噶沒斯特進檢校工部尚書左金吾衛大將軍同正封懷化郡王其酋帥徧加戎秩賜之金紫於是穹廬之長盡識漢儀左衽之人咸被王澤矣臣聞書載率服美大舜之功詩列既平顯周宣之德暨漢宣帝亦單于慕義呼韓來朝歷紀數千稱者三代則知非常之運必待非常之君誠契感通斯為難遇伏惟聖仁文武至神大孝皇帝紹高祖太宗之神武慕玄宗憲宗之遠畧英才天縱武節霆馳靜深之謀淵然

若海先難之志屹然若山自嗚沒斯歸款朔邊注心魏  
闕制置大畧盡出宸筭漢高從善能用六奇光武揣情  
坐知千里諸將無奪旗之効羣臣乏借箸之籌夫天以  
信而成功地以定而載物惟大君懋一德法兩儀故能  
懷異俗之心盛中興之業嗚沒斯者回鶻之貴酋也夙  
稟正性生知大義識倚伏之數明禍福之機回鶻運屬  
天亡歲久不稔畜產大耗國邑為墟流亡徧於沙漠僵  
仆被於草莽由是國之將帥各率吏兵或入西戎或歸

諸部惟嗚沒斯精誠上達天誘其衷拔自狼居之山願  
拜龍顏之主封章漉懇指日誓心不奪之誠介如石矣  
先是有赤心宰相桀傲亂常頗為邊患嗚沒斯潛布誠  
款於天德軍使田牟暴其罪狀梟首以徇歸大國明也  
戴聖君忠也去亂邦智也服強敵義也其比四夷悉謂  
誠臣昔仲尼以曾參孝因為陳君臣父子之義以著孝  
經今聖主以嗚沒斯忠爰採武義貞烈士以為歸忠傳  
則聖人善誘之道又何以加於此乎廼集秦漢以來至

聖朝去絕域歸中國獲名節自著功業保終者三十人  
勒成上下兩卷其不因獻款無迹可稱者今並不載臣  
又聞為善者天報之以福為不善者天報之以殃神道  
昭晰應如影響嗚沒斯方欲保大節成大勲宜乎佩服  
斯文以為鑒戒臣備位台鉉獲奉睿謀受詔序事冠於  
篇首

黜戛斯朝貢圖傳序

昔越裳貢雉薦於宗廟西旅獻獒陳以典訓所以感其

至而戒其初也仁聖文武至神大孝皇帝御歷之四年  
天瑞燦爛王道昭焯五材並用六轡斯柔布政宣室以  
張神化振兵朔野以耀威靈故得天晬而清日晏而明  
蟲螟不生嘉穀以成中寓既安四夷來庭由是龍荒君  
長黔憂斯遣使注吾合素等上表獻良馬二疋絕大漠  
而貢赤誠涉流沙而霑赭汗非至德所感孰能臻於此  
乎皇帝以前有鸞旂焉用驥騄不貴龍友鳴駕鼓車乃  
命其使見於內殿賜以珍膳錫之文錦謹按故相魏國

公賈耽所撰古今四夷述點戛斯者本堅昆國也貞觀二十一年其酋長入朝授以將軍印拜堅昆都督逮于天寶季年朝貢不絕暨中國多難為回鶻隔礙點戛斯忿其桀驁乘彼薦饑於是破龍庭焚罽幕蕭條萬里地無種落始得出重泉而見白日披氛霧而覩青天臣伏見太宗謂羣臣曰南荒西域自遠而至其故何哉宰臣房玄齡對曰殊域來朝者中國乂安帝德遐被所致也太宗曰向中國不安亦何緣而至朕親此懷懼何者昔

秦始皇并吞六國漢武帝威加戎狄今殊方異類無遠  
不賓竊比秦漢想無多愧亦欲傳之子孫念二王之末  
途朕所以不能不懼爾臣伏思太宗往日之懼致我唐  
百代之隆則聖祖詒謀可謂深矣此太宗所以永保鴻  
名為受命之祖陛下所以丕承王業為中興之主豈不  
宜哉天旨以賈耽有陳平鎮撫之才得充國通知之敏  
其所述作該明古今乃詔太子詹事韋宗卿秘書少監  
呂述往蒞賓館以展私覲稽合同異覲縷闕遺傳胡貊



堯離之音載山川曲折之狀條貫周備文理洽通臣伏  
以貞觀初中書侍郎顏師古上言昔周武王天下太平  
遠國歸款周史乃集其事為王會篇今萬國來朝蠻夷  
率服實可圖寫請撰為王會圖有詔從之臣輒因韋宗  
卿呂述所紀異聞飾以續事敢叙率服以冠篇首

會昌一品集卷二

欽定四庫全書

會昌一品集卷三

唐 李德裕 撰

制

宣懿皇太后祔太廟制 奉敕撰

門下朕近因載誕之日展承顏之敬太皇太后謂朕曰  
天子之孝莫大於丕承人倫之義莫重於嗣續穆宗睿  
聖文惠孝皇帝厭代已久星霜屢遷禍宮曠合食之禮

惟帝深濡露之感宣懿皇太后長慶之際德冠後宮夙  
表沙麓之祥實茂河洲之範先朝恩禮之重中壺莫偕  
況誕我嗣君纘承宣宗已協華于先帝方延祚于後昆  
恩廣詒謀庶弘博愛爰遵舊典以慰孝思當以宣懿皇  
太后祔太廟穆宗睿聖文惠孝皇帝室率是彝訓其敬  
承之朕祇奉慈旨載深感咽宣示中外咸使知聞主者  
施行

仁聖文武章天成功大孝皇帝改名制

王者照臨萬寓名豈尚於難知敬順五行理宜避於勝  
伏徵諸前史義實炳然昔炎漢之興洛傍去水所都名  
號猶乃避之況我國家運昌土德豈可以王氣勝於君  
名所以憲宗繼明之初實已捨水必有冥數叶於禎祥  
漢宣帝采服北夷弘宣祖業功德之盛侔於周宣御歷  
十年乃從美稱朕遠惟大漢之事近稟聖祖之謀爰擇  
嘉名式遵令典敬承天意永保鴻休宜改名為炎仍令  
所司擇日分命宰臣告天地宗廟其舊名中外表章不

得更有回避布告遐邇咸使聞知

遣王會等安撫回鶻制 奉敕撰

敕自古令王撫寧荒服忠於國者則有繼絕之恩順於  
道者則有固存之義所以厚其嚮化優以報功回鶻累  
代姻親久修臣禮服我聲教保茲信誠昔以國難識其  
忠良嚴霜見其貞松疾風知其勁草永言勲力豈忘予  
懷如聞為紇斡斯所攻兵折衆叛畜產大耗國人薦饑  
流離轉徙遠踰沙漠近因太和公主遣使入朝已知新

立可汗寓居塞下告窮請命未有所歸每念艱危載深  
憫惻今欲拯卹窮困撫慰瘡痍使四方知朕不忘舊勲  
保其大順昔匈奴乖亂呼韓款塞漢宣帝轉粟賑救權  
而施宜故得三代稱藩北邊罷警前代令典可不務乎  
宜令右金吾衛大將軍兼御史大夫王會持節充安撫  
大使宗正少卿兼御史中丞李師偃充副使專往慰問  
仍賑米粟二萬石俾期安輯離散漸就漢南再復舊疆  
永保恩好宣示中外宜體朕懷

討回鶻制 奉宣撰

門下夫天之所廢難施繼絕之恩人之所棄當用侮亡之道朕每思前訓豈忘格言回鶻比者自恃兵強久為桀驁凌虐諸部結怨近鄰紇圻斯潛師彗掃穹廬瓦解種族盡膏於原野區落遂至於荆榛今可汗亡逃失國竊號自立遠踰沙漠寄命邊鄙朕深念衰殘尋加賑卹每陳章表多詐諛之詞接我使臣如全盛之日無傷禽哀鳴之意有困獸猶鬪之心去歲潛入朔川大掠牛馬



今春掩襲振武逼近城池可汗皆自率勁兵首為寇盜  
不恥破敗莫顧姻親河東節度使劉沔料敵伐謀乘機  
制勝發蠻貊之騎以為前鋒蹇翎

一本作飲漢書陳侯  
湯傳蹇歛侯之旗

之旗弋彼在穴短兵鏖於帳下元惡軼於彀中況乘匪  
六羸衆纔一旅儲糧已竭計日可擒太和公主居處不  
同情義久絕懷土多畏亟聞黃鵠之歌失位自傷寧免  
綬衣之歎念其羈苦常軫朕心今者脫於豺狼再見宮  
闕上以攄宗廟之宿憤次以慰太皇太后之深慈永言

歸寧良用欣感其回鶻既以破滅義在剪除宜令諸道  
兵馬並同進討河東立功將士以下優賞續次條疏處  
分應在京外宅及東都修功德回鶻並勒冠帶各配諸  
道收管其回鶻及摩尼等莊宅錢物等並委功德使與  
御史臺京兆府各差精強幹事官點檢收錄不得容諸  
色職掌人及坊市富人輒有影占如有犯者並當極法  
錢物納官摩尼等僧委中書門下即時條疏聞奏於戲  
昔漢宣帝值匈奴乖亂推亡固存呼韓單于攜國歸命

入朝保塞漢后所以有擁護之恩邳支單于背叛禮義  
傷毀威重漢史所以明可誅之罪二人禍福皆自取焉  
四夷百蠻宜以為鑒布告中外深體朕懷主者施行

討劉稹制 奉宣撰

門下定天下者致風俗於大同安生人者齊法度於畫  
一雖晉之欒趙家有舊勲漢之韓黥身為佐命至於干  
紀亂律罔不梟夷禁暴除殘古今大義劉悟填居海岱  
嘗列牙爪屬師道阻兵六師問罪三面開網一境離心

乘此危機遂能歸命憲宗嘉其誠款授以南燕穆宗待以腹心委之上黨招致死士固護一方逮於末年已虧臣節劉從諫生稟戾氣動扇剛風因跋扈之資以專封壤恃紀綱之律以逞驕恣暫展執珪之儀終無上綬之請隙駒為樂魏豹姑務於絕河井蛙自居孫述頗聞於巴蜀大受亡命妄作妖言中訶朝廷潛圖左道輒謀動戎師屢奏陰謀顧苔卵之可矜豈泉魚之是察暨乎沉痛曾靡哀鳴猶駐將盡之魂恣行邪僻之志罔惑舊校

樹立狡童中使挾醫莫覩其朝服近臣銜命不入於壘  
門逆節甚明人神共棄其贈官及先所授官爵并劉稹  
在身官並宜削奪成德軍節度使王元逵魏博節度使  
何弘敬或姻連王室或任重藩維懇陳一志之誠願揚  
九伐之命吳漢任職受詔而初無辨嚴卜式朴忠未戰  
而義形於內況成德軍嘗以驍騎橫衝首破朱滔戰勢  
方酣再回魯陽之日鼓音不息三周不注之山魏博軍  
亦以大旆涉河竟殲師道建十二郡之旗鼓以列降人

削六十年之厲階盡歸王化士賈餘勇軍有雄名必能  
稟鄒侯之指蹤成葛亮之心伐咨汝二師朕尤注懷元  
逵守本官充北面招討澤潞使弘敬守本官充東面招  
討澤潞使潞府曩者烈祖在藩先天啓聖符瑞昭晰績  
事煥於泗亭鑾輅巡游金石烈於代邸實為可封之俗  
久為仁壽之鄉艱難以來頗著誠節必非同惡咸許自  
新其昭義軍舊將士及百姓等如保初心並赦而不問  
昭義軍舊大將等如能舍逆效順以州郡兵衆歸降者

必厚加封賞如能擒送劉稹者別授土地以振勲庸其  
村鄉百姓如所在團結歸順者亦加爵賞劉悟下鄆州  
舊將校子孫及劉從諫近招致將士等喻以善道宜聽  
朕言凡秉義立名須明大順未有忠於所奉上悖君親  
昔卻至有言受君之祿是以聚黨有黨而爭命罪孰大  
焉田橫能得士心人多致命伏於海島莫敢猖狂及漢  
高名之奔走向闕豈嘗違拒漢使留止田橫唯慕殉以  
成仁不相挺而作亂故得其王歿延殊寵光顯令名爾

等既有義心宜思改悔如能感喻劉稹束身歸朝必當  
待之如初特與洗雪爾等舊校亦並甄酬仍委夷行劉  
沔茂元各務進兵同力攻討其諸道進軍並不得焚燒  
廬舍發掘丘墓擒執百姓以為俘囚桑麻田苗皆許本  
戶為主罪止元惡務安生靈於戲藩維大臣抗疏於外  
髦俊舊老昌言於朝戒朕以祖宗之法不可私一族刑  
賞之柄所以正萬邦宜用甲兵陳於原野雖朕以恩不  
聽羣臣以義固爭詢自僉謀諒非獲已布告中外明體



朕懷主者施行

授王宰兼充河陽行營諸軍攻討使制

奉敕  
譔

敕淮南勁兵伏灌夫之勇河內雄屏委寇恂之忠各用  
所長俾專大任以茲制勝斯為良圖忠武軍節度使銀  
青光祿大夫檢校工部尚書兼許州刺史御史大夫上  
柱國王宰結髮從軍擁旄為將一劍橫陳萬篋皆全陰  
則難窺勇能重閉亞夫急緩之任繼武絳侯祭彤禦侮  
之才為吾子路近者狂寇憑阻屢犯顏行茂元莫寔定

居驟聞三捷願言奮旅方展六奇遽屬爽秋暫嬰寒泄  
誠威重之可倚顧卧護之未任是用改爾乘軒總齊諸  
校隱如敵國禦彼奔衝昔韓信建旗出井陘之隘鄧艾  
束馬越陰平之艱皆立奇功稱為名將爾宜自厲無愧  
前良

授劉沔招撫回鶻使制 奉宣撰

昔東漢中夏既寧匈奴饑饉臧宮請命將臨塞圖刻石  
之功光武報云柔能制強且傳聞之事常多失實雖滅

大寇不如息人朕每覽前史為之興嘆又以大禹修德  
有苗歸心周穆徂征荒服不至固存取亂在擇良圖回  
鶻項以本國薦饑落種攜貳紇圻斯乘其衰亂遂覆危  
巢既焚老上之庭盡剪名王之族可汗失地遠害來附  
塞垣朕言念姻親不忘勲力諭以呼韓款塞漢氏舊章  
外不干內國之大典且分兵食抹彼饑人令歸漠南方  
議賑贍屬可汗久嬰沉痾酋長異心雖隨畜薦居固無  
定所而控弦深入頗亦渝盟邊將戎臣屢抗章䟽策慮

惛臆咸請驅除朕以王者之師以全取勝匈奴見短嘉  
婁敬之善籌馬邑設權戒王恢之兵首推誠舍垢亦以  
踰時况朔夜沍寒有鞞塚之患陰山遙路多曲折之艱  
宜以德綏豈勞兵碎某官劉沔久臨沙漠頗識邊情既  
啟十乘之行必致六羸之道委之告諭方俟成功可守  
本官充招撫回鶻使如不自改悔終須驅逐其諸道行  
營兵馬使權令指揮主者施行

授張仲武東面招撫回鶻使制 奉宣撰

門下古人云兵者所以明德除害也故舉得於外則福  
生於內朕每念戎事務安生靈既獲遠圖宜恆長奠回  
鵲可汗寄託塞上未歸虜庭近者遣使薊門懇陳誠款  
宋人病告於予反朝鮮心附於樓船繫我信臣實得要  
領幽州盧龍軍節度副使知節度事觀察處置押奚契  
丹兩蕃經畧盧龍軍等使銀青光祿大夫檢校工部尚  
書兼幽州大都督府長御史大夫蘭陵郡王食邑三千  
戶張仲武風雲感契鳧藻協誠自升將壇首剪狂寇戈

鈇亟聞於彗埽牛馬殆至於谷量故能望影揣情已探  
致虜之術豈止聞風破膽益堅慕義之心遽奏封章願  
申告諭彼既率服寧忘懷柔況邊騎往來疾於風電沙  
場負邈介以山川臨敵應機固難統一昔衛霍之襲葷  
允異道而征辛趙之繫罕羌兩從其志成予廟勝之策  
在舉髦傑之臣俾爾鷹揚挫其狼顧將復蠻夷之叛固  
在七擒勉思將帥之風無忘五利崇以夏官之秩委其  
統制之權當竭一心敬茲休命可檢校兵部尚書兼充

東面招撫回鶻使其當道行營兵馬使及奚契丹室韋  
等並自指揮餘如故主者施行

會昌一品集卷三



欽定四庫全書

會昌一品集卷四

唐 李德裕 撰

制

授王元逵平章事制

門下古之命帥必重其名假三事之崇允萬夫之望故  
韓信以丞相擊魏樊噲以相國伐燕克成茂功賞抑有  
典成德節度使鎮冀深趙等州觀察處置兼充北面行

營招討澤潞等使金紫光祿大夫檢校司徒兼鎮州大  
都督府長史御史大夫駙馬都尉雲騎尉王元達生稟  
忠厚天資信誠竒正得於心機嚴莊表於師律去病之  
畧無假孫吳翁歸之才實備文武屬狡童逆命自固穴  
巢果能揚義聲以載馳繇直道而先奮鋒逾駭電勢盛  
疾雷宣士卒上據層巒削成垣壘下臨平壤盡見秋毫  
始擒伏莽之戎遽拔升天之險尋又陳兵原野漸洗堯  
山摧困獸之鬪心挫螳螂之怒臂棄甲者萬計折首者

千人先獻戎俘益彰臣節彼則望王師之陳草木為兵  
聞吾帥之風椒蘭比德顧其殘孽豈獲稽誅夫賞不逾  
時速人為善雖高敷五教已列三公而禹分兵麾宜佩  
相印是用命爾升于鼎司於戲昔吳起有大功者三不  
為魏相竇嬰破藩國者七未踐漢台豈非名器之重曷  
常虛受爾其奮揚威武殲厥渠魁當感激而成功勿遷  
延而玩寇服茲休命可不戒哉可檢校司徒同中書門  
下平章事兼鎮州大都督府長史依前充成德軍節度

使鎮冀深趙等州觀察處置魚充北面招討澤潞等使  
散官駙馬勲如故主者施行

授石雄晉絳行營節度使制

門下兵家之策戒在勢分故楚為三軍破於英布光武  
料敵非劉尚之別營葛亮出師制魏延之異道專其大  
任方見成功斷自朕心授之戎律天德軍豐州四城都  
防禦本管押蕃落等使兼充晉絳行營諸軍副使銀青  
光祿大夫檢校左散騎常侍豐州刺史御史大夫上柱

國石雄倜儻仗義沉密有謀近者被羽先登搴旗深入  
剪彼葦允碎其穹廬勇則冠軍威能振敵屬壺關逆命  
羽檄交馳命征虜奉公之心思成臯過險之將嘉其壯  
節召自極邊既而亞夫會兵馳六乘之傳庶乎馬武力  
戰為衆軍之鋒朕以彥佐早升大將之壇久服上公之  
冕資其碩望任以指蹤鄧禹之鎮關河功雖未遂羊祜  
之守吳會不必自行罷戎役以會朝待寇寧而撫俗親  
授方畧慰彼蒸黎爰擢奇才付予重事爾其重申兵法

奮起士心去病無以家為勿邀天幸臧官保於常勝實  
在貴謀敬聽朕言副茲寵寄可守本官兼充晉絳行營  
諸軍節度使餘竝如故主者施行

贈裴度太師制

敕堯之舊臣伯益顯庸於舜禹周之元老召公流美於  
成康永惟其人是屬良相裴度始以謀策除害佐烈祖  
之中興終以忠貞立朝毗累聖之鴻業經緯之志華皓  
不衰功勲爛然圖史輝焯奸邪所忌艱危于時暨氛霧

既開魚水將叶條風孰見其喜愠零雨皆美其來歸未  
踐明廷遽嬰沉痼威鳳莫翔於舊治虛舟長往於夜川  
殂謝之初朋黨異義贈典不稱人情鬱然屬告類上玄  
渙流大號載懷先正宜有褒崇寵既極於維師恩有加  
於在昔豈必望鄧侯之壟方念茂功過梁道之祠乃思  
遺美以茲為勸可不務乎

贈陳夷行司徒制

敕昔柳莊云亡輟宗廟之祭公叔既歿表貞惠之名前

代所以追往悼懷飾終加禮永言髦傑宜峻舊章故河  
中節度晉絳磁隰等州觀察處置等使檢校司徒兼河  
中尹御史大夫陳夷行身為儒宗位致宰相言必體要  
行歸於周得壺遂之深忠持顏子之極樂信能感物桃  
李所以不言思在無邪藜藿由其不採朕續承鴻業再  
授鈞衡陳羣立朝道無適莫葛亮稱物心匪重輕雖壯  
趾為災躡步為蹇朕之毗倚方圖始終任以建牙暫去  
巖廊之上射不穿札遂居將帥之間方期永年為我良



翰遽聞淪謝痛悼于心是用襚以哀章載之簡冊言念  
舊德尚懷黃髮之謀緬想貞風爰舉素絲之節以資緝  
禮用慰幽魂

贈崔瑗左僕射制

敕孔子以顏冉之行首於四科漢代以荀陳之門方於  
八凱乃眷時哲保茲令名用舉飾終之恩以抒殲良之  
歎故山南西道節度使銀青光祿大夫檢校吏部尚書  
兼興元尹御史大夫上柱國崔瑗誠明履正粹密隣幾

有子政之精忠得公綽之不欲禮樂二事以為身文仁義五常自成家範往以茂器列于大僚屬賢相受誣廟堂議法用長孺之道以右正人微京兆之言豈聞非罪既是魏其之直益彰王鳳之邪莊色于朝羣公聳視讜詞不撓淑問攸歸歷踐名藩皆有遺愛居常慎獨清則畏知爰自子衿迄于白首厲翼之志終始不渝未陟台階實孤公望追榮左揆式是優崇

贈王茂元司徒制

敕昔許穆公身歿於師贈以侯服王事加等春秋所書  
言念勞臣終于盡瘁舉茲盛典用峻彝章王茂元幼則  
服儒長能習吏晚為邊將頗振軍聲近者元戎啟行大  
旅臨境誓陟羊腸之險寧辭馬革之勞來必挫鋒去者  
奪魄挑戰孤壘自揭高旌坐觀藝火之蓬方解迎刃之  
竹必當樽俎制勝枕席還師勢如風霆功在刻漏遽嬰  
沉痼莫展良圖伏波之壯勇不衰呂蒙之療護無及日  
未回於三舍星已旋於再周列諸葛之鼓旗徐驅而返

開祭遵之車騎悼往則深亦既聞其綏復是宜加於哀  
斂勉爾羣帥知予報功

贈右衛將軍李安靜制

敕昔班固有言何武王嘉區區以一簣障江河用歿其  
身朕常以固作一代之典非所以垂法勸後也若觀時  
以避禍量力以圖全則三綱之道幾於絕矣故右衛將  
軍李安靜其祖太子少師綱謬大節炳於青史安靜  
聿修厥德不隕令名往者產祿擅朝充躬交亂每念王

室殆於阨危不憚芳蘭之焚竟全孤竹之志廣稱遺老  
抗感憤之詞苟不食言由忠貞之故永懷臣節遠邁前  
良近者深戒有司下令遴揀惟爾苗裔靡有孑遺昔庭  
堅不祀臧文所歎仲宣無後魏祖興嗟榮以先王之臣  
褒以揚名之典懋茲休寵用慰冥魂

贈故蕃維州城副使悉怛謀制

敕兵家之法地有必爭遠則漢氏之得陰山匈奴慟哭  
近則張愿之城河外朔邊底寧乃眷維州實為險隘有

金湯之固居襟帶之衝沒為戎疆垂六十載故蕃維州  
城副使悉怛謀嘗解辮髮獻其壘垣議臣託以和盟沮  
其誠款尋令束縛歸戮北庭彼獲甘心且無噍類昔常  
山臨代為全趙之寶符河西絕羌斷西戎之右臂棄茲  
要害用長寇讐至今蜀人言必流涕豈陳湯之專命由  
匡衡之廢忠言念始謀久懼幽枉爰加寵贈用慰貞魂  
授元晦諫議大夫制

敕昔汲黯薄淮陽守願出入禁闥補過拾遺則諫爭之

任實資諒直我求其比今得正人吏部郎中元晦往在  
內廷嘗感先顧奮發忠懇不私形骸俯伏青蒲至於雪  
涕數共工之罪不蔽聖聰辨垣平之詐益張文德近因  
旌別邪正宰弼上言以魯公藏畧莫如寘革於左右漢  
后輯檻孰若列游於公卿是用命爾登於文陛爾其副  
我寵擢不替初心勿沽小名以枉大節勿避嫌怨以負  
公評我求端士用繼前良期爾盡規致予無過勉服厥  
官毋忝優恩可

授徐商禮部員外郎制

敕朝議郎殿中侍御史內供奉上柱國徐商于公以容  
駟高閎虞氏以升卿名子其所全活不聞大賢猶誠感  
幽神慶流苗裔矧乃祖往以淑聞嘗為理官屬政在呂  
宗謀克王室將相陷辟忠良受誣而深念羣獄之寃固  
拒詔使分別楚囚之濫自履危機義激命輕仁為已任  
有是陰德宜覃後昆爾風度粹和文詞溫麗列於清憲  
雅有貞標既旌先正之忠爰舉賞延之典勉修官業無



替家聲可

授狄魚謨魚益王傳鄭東之魚益王府長史制  
敕古者聖人之教子也皆妙選天下之端士以衛翼之  
漢代梁王好書則以賈誼經緯之才推明其志淮陽好  
政則以玄成禮讓之節鎮靜其浮前王令猷百代良法  
况朕建立元子錫之粵區朱邸初開黃髮是憲以魚謨  
慷慨納說有爰絲正席之忠以東之取捨俟時有貢禹  
彈冠之操皆行不苟合誠無暗欺歷職有聲居正無撓

舉其素行擢在首僚爾宜廣德義之風明孝愛之道俾其嚴於問寢敬不絕馳化與心成中道若性服我休命可不慎歟

授鄭朗等左諫議大夫制

予欲左右前後皆得正人朝夕交戒儆予之闕所以分左右而備箴諫也思見大儒骨鯁白首耆艾論議通古今喟然動衆心所以增其秩而厚其祿也朝散大夫守諫議大夫魚弘文館學士上柱國鄭朗等皆以貞正守

道列於左掖從容諷諫每竭嘉猷况朗璜近因陞見乃  
能庭爭執以言責本於志誠昔峻坂乘危爰絲攬轡期  
門近出次况當車增主之明二臣之力我求端士用繼  
前良期爾盡規致予無過拾遺左右汲黯之願已諧祿  
賜愈多貢禹之誠當勵勉思厥職無忝優恩可

授鄭裔綽渭南縣尉直弘文館制

敕宣議郎前行京兆府叅軍驍騎尉滎陽縣開國子鄭  
裔綽昔漢武帝云有社稷之臣汲黯近之矣緬懷先正

實邁前良況兩代持衡皆有貞節守正持法遺風凜然  
爾生於德門且服儒訓黃金不遺唯守於一經白環比  
德方榮於四代嘉其勵行不隕令名俾從丹地之遊佇  
繼緇衣之美可京兆府渭南縣尉直弘文館散官勲如  
故

授李丕汾州刺史制

賈誼云守圉扞敵之臣誠死城郭封疆聖人有金城者  
此物此志也若火焚岡而不改其貞風振野而獨標其


勁臨危自奮見義必為得不寵以命爵列於上賞忻州  
刺史兼御史中丞李丕幼而倜儻長負不羈才耀奇而  
穎出智釋結而觴解禦侮是寄益德冠於三軍騷動得  
人劇孟雄於一敵昔在爾祖志康國屯翼龍而飛既濡  
其雨露刑馬而誓已表於山河貽厥孫謀載揚休問近  
者稔生參代盜起汾川保信都之城不為威惕戮邯鄲  
之使終以節全戎士間行奏章狎至閱其忠款可謂著  
明乃眷西河控于大厦文侯舊壤干木遺風以節概著

者居之固其宜也勉圖嘉績以保令名可

授李丕晉州刺史充冀代行營攻討副使制

敕晉謀元帥必有佐軍漢制出師皆立副貳所以重戎  
事而肅王命也李丕頗有大慮常好奇功自為攻拒之  
書尤邃揣摩之術淬其智又所未兆之機森其禮干得  
備嚴之稱暨蟬蛻丹水鵬搏赤霄未及歲暮累見誠節  
今以玉壁重地汾河要津俾換珪符用佐樽俎庶乎易  
行而誘成苗賁之為不胥而驅效葉公之入勉於盪寇

副我知臣可



會昌一品集卷四



欽定四庫全書

集部

會昌一品集卷八至

詳校官監察御史臣范衷

檢討臣何思鈞覆勘

總校官庶吉士臣倉聖脉

校對官編修臣勵守謙

謄錄進士臣黃嵩齡

欽定四庫全書

會昌一品集卷五

唐 李德裕 撰

詔敕上

詔敕凡有敕字者便行無敕字者請翰林添獎飾語他皆倣此

賜回鶻可汗書 奉宣撰

敕我國家統臨萬寓列塞在陰山之南先可汗總率本部建牙於大漠之北各安土宇二百餘年此天所以限隔內外不可逾越近聞為紇斡斯所敗加以饑荒國邑

為墟屍僵道路今可汗稍收離散漸近邊城將議遠圖  
今先文誥故茲命使宜聽朕言可汗累代以來推誠嚮  
國往者中原有難助剪羣兇列聖念功每加優寵寧國  
咸安二公主降嫁龍庭爰及先朝復以今公主繼好又  
以土無絲續歲遺繡繒恩禮轉深諸蕃稱羨久保誠信  
兩絕猜嫌但以國家舊章蕃漢殊壤稍逾經制豈朕所  
安去歲嗚沒斯特勒已至近界邊將憤激便請祛除朕  
念其無主可歸且令安撫今可汗既立彼又降附便合

率領漸復舊疆漂寓塞垣殊非良計又得宰相頡于伽  
思等表借振武一城權與可汗公主居住中國之制與  
外蕃不同須守前代規模祖宗法度昔漢朝單于乖亂  
呼韓款塞宣帝送單于出朔方雞鹿塞唯賑以米粟國  
初太宗皇帝命李思摩建牙於漢南遺址並存事皆可  
驗未有深入漢界借以一城與退渾党項微小雜種同  
為百姓實亦屈可汗之尊貴亂中國之舊規若以未復  
本藩或欲別遷善地求大國聲援戢諸部交爭亦須率

思歸之人且於漠南駐止朕當許公主朝覲親問事宜  
儻須應接必無所怙冀今彼國從此輯寧豈不謂去危  
就安轉禍為福朕緣公主將可汗丹誠來告深感于衷  
制置之間須存遠大故遣右金吾衛大將軍兼御史大  
夫王會宗正少卿兼御史中丞李師偃馳往喻懷爰定  
所居便申誓約神明是質豈可食言可汗並保一心自  
求多福

賜回鶻書意 奉宣撰

朕想可汗公主以久修隣好累降嘉姻望我國家如歸  
親戚朕每弘容納之意固無纖芥之嫌但以將相大臣  
累陳公議以可汗代居絕漠臨長諸蕃名聲既雄部伍  
甚衆今逗留塞上逼近邊城百姓不安人心疑惑耕種  
盡廢士馬疲勞朕二年以來保護可汗一國內阻公卿  
之議外遏將帥之言朕於可汗心亦至矣可汗亦須深  
見事體早見歸還所求種糧及安存摩尼尋勘退渾党  
項奴掠等事並當應接處置必遣得宜惟是擬借一城

自古以來未有此事天地以沙漠山河限隔南北想蕃  
中故老亦合備知只如長安東有潼關西有散關南有  
藍田關北有蒲關今四海一家天子所都猶有限隔况  
蕃漢殊壤豈可通同且天下者高祖太宗之天下朕守  
祖宗成業常懷兢畏豈敢上違天地之限中隳祖宗之  
法每欲發一號施一令皆告于宗廟不敢自專所借一  
城理絕言議想可汗便須息意勿更披陳其餘令楊觀  
專往親喻朕意

賜回鶻可汗書意

楊觀至覽表欲求糧食牛羊糧食已許自己馬價絹就振武和糴三千石緣中國以農為本最貴耕牛百姓所蓄無多常斷屠殺羊則產於北土不出中華惟塞土蕃渾各有畜牧朝廷未嘗徵率務使安存今之所求難允來意又所請束縛嗚沒斯送歸者嗚沒斯比自投邊將屢厭誠款自本國破亡之初奔迸先至塞上不隨可汗公主已是二年慮彼猜嫌自懷憂懼窮迫歸命望朕保



持未嘗有交構之言離間兩國前可汗已緣失制馭之道無兼愛之仁侵擾諸蕃肆為暴虐所以親屬內叛部落外離國破家殘實由於此今可汗失地遠客危難之中尤須追悔前非以安反側若又仁愛不至骨肉相殘可汗左右信臣誰敢自保朕統萬國非止一蕃未附者須務懷柔歸誠者因宜存撫儻徇可汗之意殊乖覆育之恩今已特許歸降止於存其種族必不別有任使授以腹心在可汗不失恩義於朝廷免虧信義豈不兩全

事體深叶良圖况前代以來盡有故事漢朝呼延邪單  
于款塞其下大將烏厲屈烏厲溫敦並來降附漢宣帝  
封以列侯又國初頡利可汗之破敗也降者甚衆酋豪  
首領至朝廷皆拜將軍僅百餘人無不撫納想可汗深  
明朕意勿更再論摩尼教天寶以前中國禁斷自累朝  
緣回鶻敬信始許興行江淮數鎮皆令闡教近各得本  
道申奏緣自聞回鶻破亡奉法者因茲懈怠蕃僧在彼  
稍似無依吳楚水鄉人性器薄信心既去翕習至難且

佛是大師尚隨緣行教與蒼生緣盡終不力為朕深念異國遠僧欲其安堵且令於兩都及大原信嚮處行教其江淮諸寺權停待回鶻本土安寧即却令如舊

賜回鶻可汗書

并公主及九姓宰相詔書

朕自臨寰區為人父母惟以好生為德不願黷武為名故自彼國不幸紇斡斯所破來投邊境已歷歲年撫納之間無所不至初則念其饑歉給其糗糧旋則知其破傷盡還馬價前後遣使勞問交馳道路小小侵擾亦盡

不計今則可汗間屯近塞未議還蕃朝廷大臣與四方  
節將皆懷疑忿盡請興師雖朕切務舍弘亦所未喻日  
昨數使卻回皆言可汗只待馬價及令交付之次又聞  
所止屢遷或侵掠雲朔等州或讐掣羌渾諸部未知此  
意終欲何如若以未交馬價且近塞垣行止之間亦宜  
先告邊將豈有倏來忽去遷延不常雖云隨逐水草  
動皆逼近城柵遙揣深意似恃姻好之情每觀蹤跡實  
懷馳突之計况昨到橫水柵下然戮至多蕃渾牛羊豈

怙驅掠黎庶何罪皆被傷夷所以中朝大臣等皆云回  
鶻近塞已是違盟更戮邊人實乖大義咸願因此剪逐  
以雪殂謝之冤然朕志在懷柔情深屈已寧可汗之負  
德終未忍於幸災石誠直久在京城備知仁一本作人心憤  
惋發於誠懇因請自行嘉其深見事機所以不能違阻  
可汗審自詢問速擇良圖無至不悛或貽後悔

賜太和公主敕書 奉宣撰

敕姑遠嫁絕域二十餘年跋履險難備罹屯苦朕每念

於此良用惘然恭惟太皇太后春秋已高慈愛深厚比  
者望姑朝謁再叙悲歡倏已歲暮寂無音耗想姑見舊  
國之城邑能不銷魂望漢將之旌麾必當流涕今朔風  
既至霰雪已零絕國蕭條固難久處旃櫓幕何以禦  
冬肉飯酪漿且非適口朕撫臨萬寓子育羣生一物未  
安終食三歎况姑累年漂泊何日忘懷想姑高明必是  
懸鑒姑承宗廟之餘慶為王室之懿親先朝割愛降婚  
義寧家國謂回鶻必能侮禦安靜塞垣使邊人子孫不

見兵革昔射鵰者不敢西向畏軒轅之臺今回鵰所為甚  
不循理蕃渾是朕之人百姓牛羊亦國家所有因依漢  
地遂致蕃孳回鵰託以私讐恣為侵掠每馬首南向姑  
得不畏高祖太宗之威靈欲侵擾邊疆姑得不思太皇  
太后之慈愛為其國母足得指揮若回鵰不能稟命則  
是棄絕姻好今日以後不得以姑為詞若恃我為親稟  
姑教令則須便自戢斂以繼舊歡想姑以朕此書喻彼  
將相令其知分更不徇非塞外祈寒且無絲續朕每御

裘服則思彼未授衣豈可以回鶻講張遂忘親愛今具冬衣若干具如別錄

賜背叛回鶻敕書 奉宣撰

近數得邊將奏報知卿等本國自有離亂可汗遇禍雖未委虛實良深震悼我國家與卿等本國代結姻好久為親戚協德同心常為諸蕃所羨故得邊候不聳封疆晏然卿等忽領師徒漠南屯集又數至天德侵掠頗擾邊人聚師無名忠義俱失既乖舊好良用憮然若卿等



本國所立新主非可汗至親人心不從擾亂未定卿等只合自申方畧竭效忠誠安靖本蕃以圖勲績亦合遣使告朕具述此心若新立可汗是中國至親人已歸附卿等便合早自相率保國寧家與可汗協心以修舊好豈得寄命塞上久勞師人朕緣與卿本國情義至深事同一體又緣公主在彼未知存亡故遣使臣魏謩往諭朕意卿宜備陳誠款不得虛詞兼禁戢師徒勿為侵軼近聞天德遊奕軍將曾有交鋒卿等既犯塞垣亦是邊

將常事今已各令諸鎮不許交兵卿宜曉諭部落各令知悉

賜回鶻嗚沒斯特勒等詔書 奉宣撰

敕回鶻嗚沒斯特勒那頡啜特勒頡于伽思於解亦阿耽于思莫賀達于宰相伊難朱密伽諦畧摩咄將軍諦畧等天德軍通所奏表至再三省覽憂屬良深彼蕃自忠義毗伽可汗以來代為親隣連降愛主恩禮特異古今莫及君臨萬國撫育殊方苟有未安則宜來告況特

勒等乃祖乃父歸誠累朝昨遣嗣澤王溶弔冊先可汗  
回始聞卿國中喪亂諸部乖離抔患卹鄰豈忘令典方  
圖鎮撫以命使臣今又知堅昆等五族深入凌虐可汗  
被害公主及新可汗播越他所未歸城邑特勒等力不  
能制思存遠圖相率遁逃萬里歸命又知欲奉公主朝  
覲忠謀不從已踰大漠之南同款五原之塞發此單使  
布其赤心言念艱危惻然軫歎料卿等皆英酋貴族羈  
寓沙場懷土之情如何可處豈非欲討除外寇匡復本

蕃抱此至忠託於大援但緣未知指的難便聽從又慮  
邊境守臣見卿忽至或懷疑阻不副朕心故遣鴻臚卿  
張賈馳往安撫朕既獎卿忠款報以信誠雖隔塞垣已  
如相見卿須深明朕衷盡吐所懷一一言於使臣令其  
速還聞奏佇聞誠願續有指揮必當副彼急難固不惜  
於事力勉於謀度用保忠勲秋熟卿及部下諸官立左  
相阿波兀等部落黑車子達怛等平安好遣書指不多  
及

賜回鶻唃沒斯等詔 奉宣撰

敕回鶻唃沒斯特勒那頡唃特勒悉勿唃特勒烏離思  
特勒赤心宰相等張賈等回知卿等欲遠赴闕廷自申  
忠款眷言深志豈忘于懷聞卿等本國頃因饑荒遂至  
離散親屬內叛諸部外侵新立可汗猶未安定既是國  
中所奉則為卿等君親古人云未有仁而遺其親者義  
而後其君者想卿等本心必思推戴況回鶻代雄朔漠  
威服諸蕃今已破傷足堪悲憤若皆自爭雄長不顧其

君各據一隅必更衰弱深慮從此之後為諸蕃所輕與  
卿等本國代結姻親久修隣好每念於此良用惻然與  
卿等為謀須務遠大莫若自相率勵同奉可汗興復本  
蕃再圖強盛朕欲召卿赴闕親諭此懷又恐可汗聞知  
謂朕幸其艱危因有招納蓋欲深全國體兼為卿等避  
嫌以此思之難遂於請卿等宜早歸本國不更滯留卿  
等表請器甲朕君臨萬國非止一蕃祖宗舊章不敢逾  
越國家未曾賜諸蕃器甲卿等亦合備知若一處開恩

必自茲援例朔州般次舊例須待可汗遣駝馬迎聖方  
令進發可汗信使未至難於遣行今有賜物具在別錄  
以卿等率先向發特示優恩緣新立可汗未受朝廷冊  
命數降使至卿等部落亦恐非宜所有賜賚止於此度  
想卿等明識深諒朕懷便令高品魏敬休宣諭想宜知  
悉

賜思忠詔書 奉宣撰

呂衛等至知卿與可汗不能戢下頗擾邊疆既告諭不

悛須兵勢驅逐卿忠誠奮發願立奇功請退渾沙陀等  
部落合勢及戰馬器甲等並已允卿所奏各有別敕處  
分今令左衛將軍何清朝蔚州刺史契苾通分領蕃渾  
部落取卿指揮朕已切戒何清朝等令其協盡心力副  
卿忠誠進取之時一切取卿方畧卿宜每事與弘順等  
商量審度事機勿為輕進但得可汗抽退不敢稽留塞  
上安寧即是卿之勲力必不可落其奸計以損國威兼  
令高品駱遂泰權監行營將士卿與之籌慮續續奏聞



欽定四庫全書

會昌一品集  
卷五

會昌一品集卷五

欽定四庫全書

會昌一品集卷六

唐 李德裕 撰

詔敕中

點憂斯國號皆依蕃書譯字所以不同商  
量冊命時奏請依賈相公華夷述便以點

憂斯  
為定

與紇圪斯可汗書 奉宣撰

皇帝敬問紇圪斯可汗時屬載陽想彼休泰朕撫臨萬  
寓子育羣生思致洽和用臻至理將軍踏布合祖等至

鑒表具知可汗生戴斗之鄉居寒露之野智謀精果材  
志沈雄威動龍荒聲馳象魏眷言丕績深用注懷我太  
宗文皇帝聖德高於百王英材軼於千古內定諸夏外  
服百蠻貞觀四年西北蕃君長詣闕頻頻請上尊號為  
天可汗是復降璽書西北蕃君長皆稱皇帝天可汗臨  
統四夷實自茲始暨貞觀六年太宗遣使臣王義弘至  
可汗本國將命鎮撫貞觀二十一年可汗本國君長身  
自入朝太宗授左屯衛將軍堅昆都督至天寶末年朝

貢不絕則可汗祖先已受我國家恩德計可汗國中遺  
老必自流傳朕纘奉丕圖思申舊好比聞天寶以後為  
回鶻所隔久阻誠款回鶻自謂天驕罔修仁義肆行殘  
忍凌虐諸蕃知可汗代為仇讐果能報國滅其國邑皆  
已立君驅彼酋渠盡逾沙漠茂功壯節近代無儔回鶻  
當中國伐叛之時嘗展勲力列聖嘉其大順累降姻親  
今失國逃亡寄於塞上只合早歸窮款受朕撫循而乃  
轉自鳴張益懷狼顧在陰山之外誘惑小蕃棄我無虞

即來侵掠恣為邊患今已四年朕大徵甲兵久欲除翦  
比令幽州太原兩道節度使皆充招撫以示綏懷望其  
悛心猶務含育而凌蔑公主頻擬傷殘馳突邊城敢謀  
盜竊近太原節度使劉沔不勝其忿潛出偏師乘其譟  
張使襲牙帳虜衆大潰穹廬盡焚元惡傷殘脫身潛竄  
已取得太和公主即至關廷回鶻殘兵不滿千人散投  
山谷旬日之內必合梟擒朕再見公主良深欣慰可汗  
既為讐怨須盡殘夷儻留餘燼必生後患想遠聞慶快

當愜素心聞可汗受氏之源與我同族漢北平太守材  
氣天下無雙結髮事邊控弦貫石自後子孫多習武畧  
代為將門至嫡孫都尉提精卒五千深入大漠單于舉  
國來敵莫能抗威身雖陷沒名震蠻貊我國家承北平  
太守之後可汗又是都尉苗裔以此合族尊卑可知昨  
聞太和公主為可汗衆兵所得可汗以同姓之國使遣  
歸還有以見可汗秉禮義之心重親隣之好朕深用感  
歎至于涕零公主尋為回鶻所奪久不歸國可汗所使

使臣皆被誅戮朕言念傷痛至今不忘昨見可汗表求訪公主使公主上天入地必須覓得今邊將憤惋已立奇功回鶻罪人計日可致即當顯戮以謝可汗况回鶻夷滅種族必盡與可汗便為隣國各保舊疆繼好息人事同一體從此邊陲罷警弓矢載橐必當諸部服從皆懷健羨知我兩國永為宗盟想可汗明智自有良筭故令太僕卿魚御史中丞趙蕃持節充使以答深誠質於神明用存大信朕言不貳可不勉歟又自古外蕃皆須

因中國冊命然可彈壓一方亟欲垂命可汗時加美號  
緣未知可汗之意且遣謝懷行趙罄回日別命使展禮  
以申和好彼國將相並存問之遣書指不多及

與黠戛斯可汗書

皇帝敬問黠戛斯可汗將軍諦德伊斯難殊至覽書及  
領所獻馬百匹鵑十聯具悉皇帝聰明天稟英姿生質  
恐德未徧覆愧漢宣魚臨之盛況與彼國壤隔內外非  
正朔所加禮既不施政豈宜及但以惜可汗宗盟之國



顧保先盟為可汗弘遠之謀須除後患所以具古今禍福往諭至懷昔呼韓單于以郅支尚存國難未靖稱蕃事漢福及子孫至後漢單于比以大父體漢而安繼襲其號上書款塞永願藩蔽漠南遂致朔塞底寧烽燧永息近則回鶻結大國之援雄長北蕃諸部率從莫敢不服一隅安樂百有餘年此事昭然可汗所覩況今回鶻種類未盡介居蕃漢之間爰及黑車子久畏其威素服其信慮彼再振當持兩端須令小蕃知朕親厚可汗棄

絕回鶻實在和好分定內附約盟則邪計奸謀無由而  
入故欲顯加冊命昭示萬方況登里可汗回鶻舊號是  
國家項年所賜非回鶻自制此名今回鶻國已破亡理  
當嫌避朕以可汗先祖往在貞觀身自入朝太宗授以  
左衛將軍堅昆都督朕思欲繼太宗之舊典彼亦宜遵  
先祖之明誠便以堅昆為國施於冊命更加美號以表  
懿親况堅者不朽之名昆者有後之稱示不忘本豈不  
美歟朕昨令禮部尚書鄭肅等與彼使臣面陳大計溫

件合將軍等皆諭朕旨願言結成豈必契徑路之金舉  
留犁之酒保茲誠信固在厥初頃者回鶻初至塞上請  
國家精兵十萬送至漠北漸歸本蕃又請借漢界一城  
養育疲羸以圖興復朕以可汗之故盡不聽從今回鶻  
是國家叛臣為可汗讐敵須去根本方保永安是天亡  
之時易於攻取古人云天與不取反受其咎可汗須乘  
此機便早務芟夷回鶻未滅以前可汗勿以飲食為甘  
弋獵為樂勵兵秣馬不可暫間所恨隔在諸蕃國家難

於同力儻更近塞豈復稽誅又恐餘孽歸降可汗未能  
盡戮納有罪之衆受逋逃之臣儻收吾憎必開邊隙則  
是蕃養虺毒自生厲階前年回鶻宰相等向漢使云李  
靖擒頡利後國中只有三二十人便卻興復郢在危困  
尚爾張皇可汗深察此言豈得不慮又聞合羅川回鶻  
牙帳未盡毀除想其懷土之心必有思歸之志速要平  
其區落無使子遺既表成功彼當絕望可汗已據積年  
之憤自為一代之雄至於居處服章皆悉變革焉得安

於所習姑務因循則何以震耀北方彈壓諸部朕撫有中夏愛育生靈常恐百姓未安一物失所豈願更廣威畧遙制要荒但緣與可汗方保和盟義同憂樂纖微之事皆欲備言想可汗與將相籌謀副茲誠意此使到日必諒朕心即宜速遣報章此當遣重臣冊命夏熱想可汗休泰將相以下竝存問之遣書指不多及

進所撰點夏斯書狀二

右今月十三日於閣中面奉聖旨令撰書進來者臣請

待鄭肅等與語了撰述今撰訖謹進上

進所撰點戛斯可汗書狀

右奉宣令臣與書內添堅昆事者緣未審知點戛斯的  
是堅昆之後恐須粗言梗槩未可明書今已依宣添改  
其間有詞意未盡處亦更加添臣學識空虛文理淺近  
再陳嚴宸伏積兢惶謹連封進

賜點戛斯書

進狀附

奉宣撰

皇帝敬問點戛斯可汗將軍諦德伊斯難殊至覽書并

白馬二匹具悉可汗降精斗極雄朔漠以稱君稟耀旄  
頭分天街而建國特負英豪之氣夙雄統御之才眷想  
嘉猷載深寤歎來書云溫忤合將軍歸國後漢使不來  
溫忤合去日朕書具云速遣報章此當遣重臣冊命自  
是可汗未諭此意報答稍遲此則尋欲遣使只是延望  
來信又云金石路已隔絕蓋為山川悠遠未得自與可  
汗封壤接連非是兩國之情猶有阻隔想可汗明識無  
復致疑又云兩地遣書彼此不會且書不可以盡言言

不可以盡意況蕃漢文字傳譯不同只在共推赤心永  
保盟好豈必緣飾詞語以此交懽每欲思惟先思好意  
不更疑惑便是明誠又云欲除去兩極間惡刺此一事  
最是嘉言緣回鶻雄據北方代為君長諸蕃臣伏百有  
餘年今可汗掃其空廬大雪讐耻功業既高於前古威  
聲已振於北方固已深務遠圖豈可更留餘燼黑車子  
不度德量力敢保寇讐則是輕侮可汗獨不嚮化此而  
可忍孰不可容況可汗前來云求訪公主使上天入地



必須覓得今若舍而不問何以取信朕懷想可汗乘彼  
盛秋長驅精騎問回鶻逋逃之罪行黑車子後服之誅  
取若拾遺役無再舉從茲盪定豈不美歟來書又云送  
公主到彼無一語來緣公主纔離可汗五日便被回鶻  
劫奪所遣來使盡被殺傷公主二年之中流離沙漠事  
已隔遠所以不再叙言然趙蕃去日已具感悅之心足  
表殷勤之意又聞今秋欲移就回鶻牙帳滅其大國便  
保舊居足使諸蕃畏威回鶻絕望稍近漢境頗謂良圖

所云請發兵馬期集去處緣黑車子猶去漢界一千餘里在沙漠之中從前漢兵未嘗到彼此聞回鶻深意常欲投竄安西待至今秋朕當令幽州太原振武天德緣邊四鎮要路出兵料可汗攻討之時回鶻必當潛遁各令邀截便可梟擒此是一本無是字軍期須合符契想可汗必全大信用叶一心諦德伊斯難殊朕已於三殿面對兼賜宴樂竝依來表不更滯留朕續遣重臣便申冊命故先達此首令彼國明知冊命之禮竝依回鶻故事可

汗爰始立國臨長諸蕃須示鄰壤情深宗盟義重以此  
鎮撫誰敢不從宜體至懷共弘遠畧春暖想可汗休泰  
將相以下竝存問之遺書指不多及

進所撰點夏斯書狀

右奉宣令臣撰進來者臣詳其表中情款一一報答盡  
不闕遺無不為文言遣其易會緣冊命時須令其稱蕃  
事須云冊命之禮竝依回鶻故事若須更有邀約即待  
朝廷命使日別賜敕書稍為允愜謹緣上進未審否

賜石雄及三軍敕書

敕石雄晉絳密邇王畿地當襟帶自卿與將士等扼其  
險要勇冠諸軍捍彼奔衝為吾砥柱每尅期深入屢挫  
狂鋒批亢擣虛導窾遊刃永言勲績豈忘於懷昔商伐  
鬼方三年乃尅周公東征三年不歸憲宗平淮西文宗  
定滄海士不解甲或三四年想卿等久在戎行心經此  
役且士之生代本為功名仗義從軍固當殉命居平則  
孝養父母成長子孫衣食所資無非國力有事則投袂

而起負甲先登撫養之恩惟此為報今者纔近百歲未  
曰勞師功在垂成往無不捷將士等各宜感勵成此功  
名上黨既平天下無事從此永安家室不復征行近者  
楊弁首為猖狂扇惑亂卒今則身膏齊斧戮及妻孥生  
為不忠之人死為負義之鬼身名俱滅可不痛哉諸部  
既安王師益振乘此聲勢必殄餘妖故令中使宣慰魚  
賜優賞卿等便須鼓行而進徑入賊界下營從此駐軍  
速圖進取勿使功業歸於別帥爵賞在於他人勉務壯

圖副茲厚遇想宜知悉

賜潞州軍人敕書意

劉稹乳臭騃童未有所識皆是郭誼王協幸其昏弱矯託軍情妄獻表章欲求繼襲志在肆行禍福自擅兵權稱感從諫之恩誓同生死及見山東三郡皆已歸降事迫勢窮歸惡劉稹令其一門受戮便欲自取寵榮不義不忠古無其比朕以誘陷劉稹皆是此二人販賣圖全義難容捨已令澤潞冀氏兩路遣軍只取郭誼王協及

同惡之類其他軍人一切不問仍各有優賞後從敕處  
分如兩道兵馬未到以前有忠義之士先非同惡者能  
自擒僂郭誼等所與優賞並同裴問王釗例處分已詔  
石雄王宰到彼不令侵擾軍人百姓如秋毫有犯便按  
軍法各宜勉思機計共保忠誠勿受姦人扇動妄生疑  
忌互相告報咸使明知

扇動一作扇惑  
妄生一作妄懷

賜党項敕書

敕自爾祖歸款國家依附邊塞為我赤子編於黔黎牛

馬蕃孽種落殷盛不侵不叛頗效信誠比聞邊將不守  
朝章失於綏輯因緣征歛害及無辜念爾遠人莫知控  
告特命朕之愛子實總元戎所冀羣師聽命而不敢自  
專諸部懷怨而有所披訴奉我憲令以保和寧如聞莫  
顧私恩遂懷憑恃攘奪不避於官物驅掠罔憚於平人  
擅興甲兵恣行攻劫豈有朝廷內地輒此鴟張道路阻  
艱商旅殆絕朕便欲詔命諸鎮同力勦除深慮玉石難  
分善惡同斃今再為條例各使得宜却令節將指揮許



其處斷如有闕濫政乘公平並遣巡院奏聞朝廷必為申理如或不知恩貸猶敢猖狂國有典章必難容捨故茲宣示當體朕懷

賜劉沔張仲武各詔

敕劉沔等自回鶻本國殘破寄命北邊朕以其艱難之時常效勲力平寧之後結以姻親義切懷柔情深兼愛亦既轉粟賑救降使撫循示信推恩朕無所愧而狼顧塞上鼠守雲中聞我有備雖暫移營稍隙復來近塞察

其情計殊未歸還朕祇荷丕圖撫臨萬寓守祖宗之法  
制思黎庶之乂安豈可蓄虺穴於塞垣養蠱毒於懷袖  
乘其馳突必欲驅除昔晉侯報楚之功避子玉於三舍  
然明一本作先軫背秦之惠覆孟明於二嶠安國庇人大義  
斯在卿宜遣使告諭明示朕懷如或遲留尚為巧詐即  
須犄角相應臨以兵威勉務良圖副茲委遇

賜張仲武詔

敕仲武周璵至省表知可汗猶有疑懼近日移營卿自

總戎麾累剪狂寇英威所振桀驁皆從仁義所綏降附  
相繼昨者可汗來依塞表已在穀中豈謂黠寇之奸心  
尚懷翻覆柔服之際又此遁逃遠揣敵情必終難保信  
昔去病深入大漠方殄獯戎近李靖再襲穹廬始擒頡  
利況卿伐謀制勝才出古人宜選練勁兵掩其無備使  
呂嘉懷貳而受首孟獲雖縱而必擒特立奇勲永光千  
古朕已令劉沔旋旆却入東徑候卿本道成功即令歸  
鎮經畧之事全以付卿須及塞草未青虜騎方困一舉

便尅使無子遺卿先發馬步一萬人於大界原防戍今  
緣可汗入卿掌握已在網羅豈得更屯精兵守無用之  
地即宜追赴本道同力剪除緣卿師旅至多費用尤重  
其出界糧料已令所司依前支給卿宜勉於盡敵以副  
朕懷

賜何重順詔

與王元逵詔同惟  
向前句九詞不同

敕重順卿代傳忠孝志在功名朕每用注心豈忘終食  
況卿先父當太和之際已有誠款思靖隣封臣節昭彰

遐邇稱歎澤潞一軍素聞忠順從前命帥皆是儒臣穆宗以劉悟有歸闕之功委之心膺令居善地鎮靖一方及殂謝之時不能堅守臣節遂使三軍上請以幼子總戎其時朝廷因循姑務安靖授以旄鉞事蓋從權今從諫疾恙所侵頗聞縣愾昨士廉奏至大將及下復請劉稹權知軍務朕深惜劉悟一門自夫逸懷以來累代忠節今劉稹又欲自擅隳其門風當撤瑟之辰罔聞憂戚在嘗藥之際便窺兵權尤為臣子所當共棄卿宜訓練

戎旅嚴固封疆候彼軍中有變便須遣書告諭令其三  
軍送劉稹歸闕請朝廷推新擇帥朕必選舊德重望委  
之撫循劉稹厚加爵賞別有任用如妄自制置邀求寵  
榮國家典法亦難寬宥澤潞一鎮與卿事體不同勿為  
子孫之謀欲存輔車之勢但能顯立功效自然福及後  
昆勉務良圖副茲委遇高秩厚賞無所吝焉

賜張仲武詔

卿智畧挺生忠誠特著每陳章奏皆契朕心言念壯猷

無忘寤寐今緣從諫疾病頗以深繇深慮將校異謀妄  
有制置太原地連河朔城府空虛已詔劉沔旋師却歸  
本鎮又緣回鶻餘燼未滅塞上須有防虞藉卿長才列  
於禦侮邊境戎事悉以副卿宜深體朕懷勉弘方畧控  
馭朔塞為我長城當使早殄餘妖永清絕漠副茲委遇  
以保功名

賜劉沔茂元詔

敕古者涼風至白露下天子乃命將厲兵以征不義申

令誓衆今則其時况蓐收司刑助天而肅殺金星動色  
應節而耀芒咨爾帥臣為予之佑得不敬順天道振揚  
兵威近有詔書令取七月中旬五道齊進王元逵久蓄  
忠憤為國除殘率兵先諸軍深入其險阻拔宣務要害  
之壘絕堯山應援之兵既以扼咽必當破膽而卿不務  
疾雷先奮欲以歲月勝彼凡為將帥誰不樂此豈祭遵  
之安重致藥伯之遷延且不副於詔書以後期於成德  
若未可深入亦要先聲宜早進軍速臨賊境樹立城柵



羅列旌旗深溝高壘勿與之戰兼擇猛將時出奇鋒令  
彼一方疲於奔命如此足分賊勢益壯東師昔趙充國  
征羌漢宣帝詔曰太白出高用兵深入敢戰者吉卿宜  
思古名將早立奇功無執狐疑之心勉務鷹揚之舉國  
之大事賞罰必行當體朕懷勿稽詔命想宜知悉

賜彥佐詔意

卿累當大任實總元戎既行節制之師須務綏懷之德  
養威持重屬在於卿至於負羽先登搴旗深入本非將

帥之事當假拳勇之材況自古出師皆有副貳臨難則  
權以相濟料敵則智以相資故韓信伐趙張耳為貳吳  
漢征蜀劉尚副軍國朝以來多用此制李勣之取平壤  
參以道宗李靖之襲陰山副之公謹近者劉沔全師北  
伐按甲雲州委石雄先鋒大破回鶻朕以石雄近摧北  
敵已著威名久在徐州諳練士卒今輟自天德與卿副  
領諸軍卿宜選徐州陳許精兵三千人便令先入勵其  
猛氣必立奇功倘能挫覆妖巢亦自勲歸元帥勉於率

下深務協心體朕至懷以副委遇

會昌一品集卷六